

## Naqqiut

Siunnersuut 6. august 2021-meersoq taarserpaa  
(Naqinnerliukkat naqqiutigineqarput)

Siunnersuummut oqaaseqaatit

### Nassuiaatit nalinginnaasut

#### 1. Aallaqqaasiut

2016-imi ukiakkut ataatsimiinnermi akuersissutigineqarluni aalajangiiffigisassatut siunnersuut ataaseq 2019-imilu ukiakkut ataatsimiinnermi akuersissutigineqarlutik aalajangiiffigisassatut siunnersuutit marluk tunuliaqutaralugit, allannguutissatut siunnersuut suliarineqarpoq.

##### 1.1 Ineqarnermut akiliutit il.il. akilerneqartarnerat

Qaammatip naanerani aningaaseriviit ulloq kingulleq ammasarfiini ineqarnermut akiliutit akilerneqartalersussanngorlugit (UKA2016/60), Inissianik attartortitsisarneq pillugu Inatsisartut peqqussutaanni nr. 2, 12. maj 2005-imeersumi § 38-mi imm. 2 allanngortinneqarnissaa pillugu, 2016-imi ukiakkut ataatsimiinnermini aalajangiiffigisassatut siunnersuut saqqummiunneqarpoq.

Siunnersuut imatut tunngavilersorneqarpoq:

*”Allannguut taamaattoq arlalitsigut pitsaaquteqassaaq.*

*Siullertigut isumaqassaaq innuttaasut ineqarnermut akiliutaat akilerneqassasoq naatsorsuutigineqarluni aningaasaateqarfimmini aningaasaateqassasut pissutigalugu akissarsiat pisortaniillu pisartakkat piffissaq taannarpiaq pissarsiarineqarsimassammata. Siunnersuut una siunertaraa innuttaasut akiligassatigut kinguaattoornissaat.*

*Aappaattut attartortitsisut pisorta qarfinnit namminersolutillu inissiaatillit piffissaq eqqortoq pissarsiassartik pisassammassut taamaattumillu akileeqqusissutit allallu kinguaattooqqassutinut aningaasartuutit annikillissallutik.*

*Isertuussassaangilaq innuttaasut pisortanut akiitsuut annertuallaaqimmat. Siunnersuut uumap kingunerissavaa akiitsuut annertusiartunnginnissaat, pissutigalugu ineqarnermut akiliut nusunneqassammat innuttaasut aningaasaateqarfimmini aningaasaateqarnissaat*

*ilimanarnerpaaffianiissammat maannakkumut peqqussutitut sanilliullugu.”*

Aalajangiiffigisassatut siunnersuutip Inatsisartuni eqqartorneqarnerani nalinginnaasumik tapersorneqarpoq. Inatsisartut Sanaartornermut Ataatsimiititaliaa 2016-imi novembarip 15-iani aalajangiiffigisassatut siunnersuummut isumaliutissiissuteqarlutik, siunnersuut akuersissutigineqassasoq innersuussutigaa. Sanaartornermut ataatsimiititaliap oqaatigaa, Naalakkersuisut siunnersuummik suliaqarnerminni ullut 14-ikkaarlugit akissarsisartunut aaqqiissutaasinnaasunik eqqarsaateqarsinnaasut.

Inissianik attartortitsisarneq pillugu Inatsisartut peqqussutaata nr. 2, 12. maj 2005-imeersumi § 38-p allangortinneqarneratigut, ineqarnermut kiisalu imermut kiassarnermullu qaammammi pineqartumi akiligassat qaammatip naanerani aningaaseriviit ulloq kingulleq ammasarfiini qaammammut siumoortumik akilerneqartalissapput.

Ilutigalugu erseqqissaatigineqarpoq, ineqarnermut kiisalu imermut kiassarnermullu nalinginnaasumik qaammatikkaartumik attartortitsisup akiliuteqaqqusisarnini allangortillugu, assersuutigalugu ullut 14-ikkaarlugit akiliuteqaqqusisarsinnaassasoq. Siunnersuutip kingunerisaanik, piffissaq akiliuteqarfiususaaq sioqqullugu akiligassaq aningaaseriviup ulloq kingulleq ammanerani akilerneqartassaaq.

Kiisalu siunnersuutip kingunerisaanik, akiligassat piffissaagallartillugu akilerneqarneratut isigineqartarlutik ullorititaasartut atorunnaassapput. Piffissaagallartillugu akiligassamik akiliisarneq, ulloq kingulleq akiliiffissami akilerneqartassaaq.

1.2 Inissiat attartortittakkat oqoqarsimanerat pillugu nalunaarsuutit

Pisortat inissiatileqatigiiffiisa attartortunngortussanut inissiamik neqeroornerminni inissiaq neqeroorutertik ukiut tallimat kingulliit iluini oqummik ajornartorsiuteqartoq paasineqarsimagaangat attartortussanut nalunaartalermissaannik pisussaaffiliinissaannut siunnersuut (UKA2019/45), 2019-ip ukiaani ataatsimiinnermini siunnersuutigineqarpoq.

Attartortut suliffimmut atatillugu inissaminnik tunineqarnerminni inissiami ukiut tallimat kingulliit iluanni oqummik ajornartorsiuteqartoq paasineqarsimagaangat attartortut inissiamik allamik tunineqarnissaminnik annaasaqaratik naaggaarsinnaalernissaat pillugu siunnersuut (UKA2019/122), 2019-imi ukiakkut ataatsimiinnermi siunnersuutigineqarpoq.

Siunnersuutit Inatsisartuni eqqartorneqarnerini nalinginnaasumik tapersorneqarput. Inatsisartut Sanaartornermut Ataatsimiititaliaata innersuussutigaa, siunnersuutit taakkua marluk Inatsisartuni akuersissutigineqassasut.

Kisiannili Sanaartornermut Ataatsimiititaliamit tikkuarneqarpoq, attartortitsisup piffissami attartortitsinerup aallartiffiani inissiap oquummik eqqorneqarsimannginneranut uppernarsaammik imaluunniit allakkatigut nalunaarummik suliaqartarnissaa ataatsimiititaliamit ornigineqarnerusoq.

Sanaartornermut Ataatsimiititaliaq allappoq:

*”Inissiat oqoqarsimaneramik nalunaarsuuteqarnissaa, piffissami inissiap attartorneqarsinnaasutut inissianik innersuussinermi innersuunneqartup oqoqannginneranut qulakkeerinnissutissatut naammangitsoq ataatsimiititaliaq isumaqarpoq. Ataatsimiititaliap kissaatiginartissinnaavaa, piffissami attartugassanngortinnerata nalaani inatsisitigut uppernarsaammik tunniussisoqartalernissaa pisussaaffingussasoq, imaluunniit inissiap oqoqannginneranut allakkatigut uppernarsaasiisoqartalernissaa. Tamannalu atuutissasoq inissiaq nammineq attartorneqassappat imaluunniit atorfik aqutugalugu inissiaq innersuunneqarsimappat.*

*Ataatsimiititaliap erseqqissaatigissavaa, illuutigisamik attartortinneqartullu isumannaatsumik aserfallatsaaliornissaat attartortitassallu attartortitsinerup aallartinnerani pitsaassutsimigut ajunnginnissaa isumannaatsuunissaallu pisussaaffigimmassuk Namminersorlutik Oqartussani kommuninilu attartortitsissartut.*

*Ataatsimiititaliap isumaqarluinnarpoq, inissiaq peqqissutsimut innarliisinnaasumik oqoqarsimappat, pitsaassutsimigut ajunngitsutut isumannaatsutullu isigineqarsinnaanngitsoq. Inissiap pitsaassutsimigut ajunnginneramik isumannaatsuuneranillu, tassunga ilanngullugu peqqissutsimut isumannaatsuuneramik inatsisit malillugit allagartamik uppernarsaammilluunniit tunniussinikkut attartortitsisup qulakkeerinninnissaa ataatsimiititaliap pissusissamisoornerusutut isigaa. Taamaattorli siornatigut qanoq ittoqarsimaneramik allagartamik uppernarsaammik attartortitsisartup tunniussinissaa pissusissamisoornerussasoq Ataatsimiititaliaq isumaqarpoq.*

*Ataatsimiititaliap tassunga atatillugu oqaatigissavaa, allannguutissatut siunnersuuteqarnissamut periarfissaqanngimmat siunnersuut allannguutissatullu siunnersuut imminnut assigiiffeqarnissaannik ilusissatut piumasaqaatinut naapertuunnaviannngimmata.”*

Nutaatut § 20 a-mik paragraffiliinissamik siunnersuutip kingunerisaanik naalagaaffimmi atorfillit, Inatsisartut imaluunniit Naalakkersuisut suliffimmut atatillugu inissiamik innersuunneqartillutik, inissiat oqoqarsimasutut nalunaarsuiffianni inissiaq allassimappat, inissiamik innersuunneqartumik itigartitsisinnaatitaallissappat.

Nutaatut § 20 a-mik paragraffiliisoqarnissaanik siunnersuuteqarnermut ilanngullugu, Namminersorlutik Oqartussat imaluunniit kommunit attartortittagaataat ukiut tallimat kingulliit iluini oqoqarsimappata, nalunaarsorneqartarnissaat pillugu nutaamik § 32a-mik paragraffiliisoqassasoq siunnersuutigineqarpoq.

Kiisalu Namminersorlutik Oqartussanit aamma kommuninit ingerlatsinermit tapiissutit pillugit § 32 b-mik nutaamik paragraffiliisoqassasoq siunnersuussutigineqarpoq. Naalagaaffimmi, Inatsisartuni Naalakkersuisuniluunniit atorfillip sulisunut inissiamik, Namminersorlutik Oqartussanit kommunimilluunniit pigineqartumik, inissianut attartortittakkanut, siornatigut oqoqarsimasunut allattuiffimmut ilaasumik tiguserusunnginnerata kingunerisaanik inissiaq inoqanngippat ingerlatsinermit tapiissuteqartoqarsinnaavoq. Inissianik Namminersorlutik Oqartussanit kommuninilluunniit pigineqartunik, siornatigut oqoqarsimasutut nalunaarsuiffimmi allassimasunik attartortitsiniapiloortoqarpat, Namminersorlutik Oqartussanit imaluunniit kommunimit ingerlatsinermit tapiissuteqartoqarneratigut ilaannaasumik taarsiisoqarsinnaavoq. Tamatuma kingunerisaanik najugaqarfiit attartornermut annaasassai missiliorneqarsinnaanngillat.

## **2. Siunnersuummi immikkoortut pingaarnertit**

### 2.1 Ineqarnermut akiliutit il.il. akilerneqartarnerat

#### a) Peqqussut atuuttoq

Inissianik attartortitsisarneq pillugu peqqussutip § 38 naapertorlugu ineqarnermut, imermut, kiassarnermullu akiligassat akilerneqarnissaat pillugit attartornermut isumaqatigiisummi aalajangersarneqartut naapertorlugit akilerneqartassapput. Kingusinnerpaamik akiliiffissap kingulliup qaangiunnerata kingorna ulluinaat pingajuanni akilerneqarsimassapput. Ulloq taanna arfininngorneruppat, nalliuttuuppat imaluunniit Inuiaat Ullorippassuk ulluinnarmi tullermi akiliinissaq piffissaq eqqorlugu akiliinerussaag.

#### b) Siunnersuut

Inissianik attartortitsisarneq pillugu peqqussutsip § 38 allanngortinneqarnissaanik siunnersuuteqarnikkut ineqarnermut, imermut, kiassarnermullu akiligassat akilerneqarnissaat pillugit attartornermut isumaqatigiisummi aalajangersarneqartut naapertorlugu sulii akilerneqartassapput. Tamanna attartortitsumut pisariaqartumik eqaatsuutitsissaaq.

Attartornermut isumaqatigiisummi allatut aalajangersarneqarsimatinnagu ineqarnermut, imermut, kiassarnermullu qaammammut pineqartumut akiligassaq, qaammatip naanerani aningaaseriviit ulloq kingulleq ammasarfiini qaammammut siumoortumik akilerneqartalissapput. Ullormi akiliiffissami kingullermi akiligassaq akilerneqartassaaq. Tassalu ullormi kingullermi akiliiffissap kingorna akiliinissamut ullunik periarfissiisoqartassanngilaq.

Erseqqissaatigineqassaaq ineqarnermut, imermut, kiassarnermullu akiligassat akilerneqarnissaannut attartortitsisup piffiussalissatut aalajangersagaatut akileeqqusissuteqarsinnaammat, assersuutigalugu ullut 14-ikkaarlugit. Ullormi akiliiffissami kingullermi akiligassaq akilerneqartassaaq. Tassalu ullormi kingullermi akiliiffissap kingorna akiliinissamut ullunik periarfissiisoqartassanngilaq.

2.2 Inissiat attartortittakkat oqoqarsimanerat pillugu nalunaarsuutit

a) Peqqussut atuuttoq

Namminersorlutik Oqartussat kommunillu inissiaataanni attartortittakkani oqoqarsimaneq, allatigulluunniit attartortittakkani kukkunerit amigaatilluunniit pillugit nalunaarsuisoqarnissaanik peqqussut atuuttoq naapertorlugu pisussaaffeqanngilaq.

b) Siunnersuut

Nutaatut § 32 a-mik paragraffiliisoqarnissaanik siunnersuuteqartoqarneratigut, Namminersorlutik Oqartussat kommunilluunniit inissiaataanni attartortittakkani ukiut kingulliit tallimat iluini oqoqarsimasut nalunaarsorneqartalissapput. Inissiaq attartortittagaq nutarterneqarsimappat, inissiarlu attuumassuteqanngitsumit paasisimasalimmiillu misissuinikkut oqoqarunnaarsimasutut uppernarsarneqarsimappat, inissiaq pineqartoq nalunaarsorneqartariaqassanngilaq. Annertugisassaannigitsumik oqoqalersimasut pillugit nalunaarsuisariaqannginneq pillugu Naalakkersuisut malittarisassanik aalajangersaanissaannut piginnaatinneqarput.

Namminersorlutik Oqartussat kommunillu inissiaataat attartortittakkat siunnersuummi pineqarput. Namminersortunit attartortittakkat, namminersortunullu inatsisit atuuttut tunngavigalugit selskabinit inissiat attartortinneqartartut siunnersuummi ilaatinneqanngillat. Taamaalilluni Namminersorlutik Oqartussat kommunillu attartortittakkat amerlanerpaartaannik piginnittuunerat qitiusutut isigineqarpoq.

Tamatuma saniatigut namminersortut inissiaataanni attartortittakkani oqoqalersarneq annertuumik ajornartorsiutinngortussaannigitsutut isigineqarpoq. Kiisalu attartornermi akiliutit qaffannerinik kinguneqartussamik namminersorlutik attartortitsisartut qaavatiqut aningaasartuuteqartinneqannginnissaat pingaartutut isigineqarpoq.

2.3 Suliffimmut atatillugu inissiamik innersuunneqartumik itigartitsineq

a) Peqqussut atuuttoq

Inissianik attartortitsisarneq pillugu Inatsisartut peqqussutaanni § 20 naapertorlugu naalagaaffimmi atorfillit, Inatsisartut, Naalakkersuisullu inissiamik innersuunneqarsinnaatitaasut inissiamik innersuunneqartumik tigusinissaminnut pisussaaffeqarput. Atorfilik inissiamik innersuunneqartumik tigusiumanngikkuni, suliffimmut

atatillugu inissiamik innersuunneqarnissaminut pisinnaatitaaffeerussaaq, utaqqiisaagallartumik ineqartitaanerminut ajunngitsorsiani annaassavai, sulisitsisullu akiligaanik utaqqiisaagallartumik inissinneqarsinnaajunnaassalluni.

b) Siunnersuut

Nutaatut § 20 a-mik paragraffiliinissamik siunnersuuteqarnerup kingunerisaanik naalagaaffimmi, Inatsisartuni imaluunniit Naalakkersuisuni atorfillit suliffimmut atatillugu inissiamut innersuunneqarsinnaatitaasut, inissiaq attartortittagaq Namminersorlutik Oqartussanit kommuninillu pigineqartutut nalunaarsorneqarsimappat tigusinissamik itigartitsisinnaatitaapput. Inissiaq ukiut tallimat kingulliit ingerlanerini oqoqarsimappat, inissiaq nalunaarsuiffimmut allanneqassaaq.

Suliffimmut atatillugu inissiaq innersuunneqartoq atorfillip tigujumangippagu, atorfillit suliffimmut atatillugu inissiamik innersuunneqarsinnaatitaanini annaassanngilaa, soorluttaaq utaqqiisaagallartumik ineqartitaanerminut ajunngitsorsiani annaassanngikkai, sulisitsisullu akiligaanik utaqqiisaagallartumik sulii inissinneqarsinnaatitaassalluni.

2.4 Inissiat attartorneqannginnerini ingerlatsinerimi tapiissutit

a) Peqqussut atuuttoq

Namminersorlutik Oqartussat kommunillu inissiaataanni attartortittakkani attartortinneqanngitsuni aningaasartuutit inissiaatileqatigiiffimmit imaluunniit ingerlatsinermut aserfallatsaaliinermullu immikkoortortamit najugaqarfiit ataasiakkaat attuumassuteqarfigisaannit matussuserneqartarput. Tamatumani Inissianik attartortitsisarneq pillugu peqqussutip § 30 naapertorlugu.

Illuutitik attartortitsisarneq pillugu Namminersornerullutik Oqartussat nalunaarutaanni nr. 12, 23. april 2008-meersumi § 17-imi imm. 3 naapertorlugu, takuuk § 1-imi imm. 1, najugaqarfimmut aningaasatigut ajornartorsiortumut attartortitsisoq ingerlatsinermut tapiissutinik tapiissuteqartassaaq. Ilaqutariinnut arlalinnut inissianut Namminersorlutik Oqartussat kommunillu attartortittagaataannut aalajangersagaq atuuppoq.

b) Siunnersuut

Nutaatut § 32 b-mik paragraffiliinissamik siunnersuutip kingunerisaanik, Namminersorlutik Oqartussat imaluunniit kommuni najugaqarfimmi attartortitsisarfiusumi, Namminersorlutik Oqartussanit kommunimilluunniit pigineqartumi ingerlatsinermut aalajangersimasumik tapiissuteqartassaaq. Naalagaaffimmi, Inatsisartuni aamma Naalakkersuisuni atorfilik, sulisunut inissiamik innersuunneqarsinnaatitaasooq, inissiamut Namminersorlutik Oqartussanit pigineqartumut, ukiut tallimat kingulliit iluanni oqoqarsimasutut inissianut attartortittakkanut Namminersorlutik Oqartussanit kommuninilluunniit pigineqartunut nalunaarsuiffimmi nalunaarsorsimasumut innersuunneqarnermini tigusiumangippat, ingerlatsinermut

tapiissuteqartoqarsinnaavoq. Ingerlatsinermut tapiissuteqartoqassappat inissiap allamut attartortinneqarsinnaannginnissaa, taamaalillunilu tamatuma kingunerisaanik najugaqarfiup ingerlatsinermut missingersuutimini amigartoorutitik matussusiisnaanissaa piunasaqaatigineqarpoq. Najugaqarfiup ingerlatsinermut missingersuutit amigartooruteqarfiginagit inissiamut inoqanngitsumut aningaasartuutit akilersinnaappagit, § 32b naapertorlugu ingerlatsinermut tapiissuteqartoqarsinnaanngilaq.

Qaammammut attartornermi akiligassaq, ingerlatsinermi tapiissutit naleqqatigissavai. Ukiumut ataasiarluni ingerlatsinermut tapiissuteqartoqarsinnaavoq, inissiamullu ataatsimut annerpaamik pingasoriarluni ingerlatsinermut tapiissuteqartoqarsinnaassalluni.

### **3. Aningaasatigut allaffissornikkullu pisortanut kingunerisinnaasai**

3.1. Aalajangiiffigisassatut siunnersuutip UKA 2019/45-p aamma UKA2019/122-p suliarineqarnerinut atatillugu, Namminersorlutik Oqartussat inissiaataannut attartortittakkanut tunngatillugu ukiuni kingullerni tallimani sanasunit akiligassiisutitit rekvisitionillu INI A/S-ip misissuinermini, ataasiartumik aningaasartuutit 9 mio. koruuninut naatsorsorpai.

Kommuneqarfik Sermersuup inissiaataanut attartortittakkanut tunngatillugu ukiuni kingullerni tallimani sanasunitakiligassiisutitit rekvisitioninullu aningaasartuutit pillugit Iserit A/S-imit paasissutissaqanngilaq.

Qarasaasiatigut systeminik pisariaqartumik pilersitsinissamut imaluunniit allaffissornikkut systeminik piusunik iluarsisuteqarnermi aningaasartuutit INI A/S-ip Iserit A/S-illu naatsorsorsimangilaat.

Nalunaarsuiffimmik pilersitsinissamut aningaasartuutissat attartortitsisumit aningaasartuutigineqassapput. INI A/S-imi nalunaarsuiffimmik pilersitsinissamut aningaasartuutissanut Namminersorlutik Oqartussat akiliutissaat, kontomi pingaarnermi 72.10.16 Inissiat attartortittakkat ingerlanneqarnerat, aningaasaliisutitit iluanaarutitit matussuserneqartassapput. Inissiat inoqannginnerisa kingunerisaanik aningaasartuutit amerlissutaat attartortunit matussuserneqarlutik akilerneqartussaapput. Taamaalilluni ineqarnermut akiliutit qaffanneqartussaapput.

Inissiap attartortittakkap sionatigut oqoqarsimanera pillugu inissarsiortunut paasissutissiisarnissaaq, inissianut attartorneqanngitsunut aningaasartuutitit qaffatsitsissaaq. Tassunga aningaasartuutissat missiliorneqarsinnaanngillat.

Naalagaaffimmi atorfilinnut, Inatsisartunut, Naalakkersuisunullu inissiaq innersuunneqartoq sionatigut oqoqarsimanera pillugu paasissutissiisalernissaaq inissianut attartorneqanngitsunut

anigaasartuutitut annertusaassasoq, tassungalu atasumik utaqqiisaasumik ineqartitsigallartarnermi anigaasartuutit aamma qaffassasut naatsorsuutigineqarpoq. Anigaasartuutissat missiliorneqarsinnaangillat. Utaqqiisaasumik ineqartitsigallarnermut anigaasartuutit sulisitsisumit matussuserneqartassapput.

Inissat attartortittakkat, Namminersorlutik Oqartussanit imaluunniit kommuninit pigineqartut oqoqarsimanerat peqputigalugu attartortinniapiloorneqarnerini inissiat inoqannginnerinut anigaasartuutaasinnaasut ilaatigut Namminersorlutik Oqartussat imaluunniit kommunit ilaata ingerlatsinermit tapiissuteqarnerisigut taarsiiffigineqarsinnaapput. Taakkununga anigaasartuutissat missiliorneqarsinnaangillat. Anigaasartuutit najugaqarfimmit matussuserneqarsinnaangippata, najugaqarfimmut atatillugu anigaasartuutit tamarmik akilerneqarsinnaanissaat siunertaralugu ineqarnermut akiliut qaffanneqassaaq.

Ingerlatsinermit tapiissutitut Namminersorlutik Oqartussat anigaasartuutaat, matumani siunnersuutip § 32 b naapertorlugu ingerlatsinermit anigaasartuutit ilanngullugit, konto pingaarnemit 72.10.16 Inissiat attartortittakkat ingerlanneqarnerat, anigaasaliissutitut iluanaarutitut matussuserneqartassapput.

Inissianut attartortinneqanngitsunut anigaasartuutit najugaqarfimmit matussuserneqartassapput.

Namminersorlutik Oqartussat kommunilluunniit inissiaataanni attartortittakkani ukiut kingullit tallimat iluini oqoqarsimasunik ataavartumik nalunaarsuisarneq aamma anigaasartuuteqarfiussaaq. Inissiat oqoqarunnaarsimasut nalunaarsuiffimmit peerneqartassapput, oqoqalersimasullu nalunaarsorneqartassallutik. Tassunga anigaasartuutissat missiliorneqarsinnaangillat. Anigaasartuutissat najugaqarfimmit ataasiakkaanit matussuserneqartassapput, ineqarnermullu akiliutissat naatsorsorneqarnerinut ilanngunneqartassallutik.

#### **4. Anigaasatigut allaffissornikkullu inuutissarsiutilinnut kingunerisinnaasai**

Siunnersuut inuutissarsiutilinnut kinguneqartussatut naatsorsuutigineqanngilaq.

#### **5. Avatangiisinut, pinngortitamut, innuttaasullu peqqissusaannut kingunerisinnaasai**

Siunnersuut avatangiisinut pinngortitamullu kinguneqartussatut naatsorsuutigineqanngilaq.

#### **6. Innuttaasunut kingunerisinnaasai**

Nalunaarsuiffimmik ingerlatsilernikkut najugaqarfiit anigaasartuutigisartagaat qaffassapput. Inissianut attartorneqanngitsunut attartortitsisumit matussuserneqarsinnaanatik najugaqarfiit anigaasartuutigisartagaasa qaffanneqarnissaat pinngitsoorneqarsinnaangilaq. Taamaattumik siunnersuut kingunerisaanik attartornermi akiliutit qaffaavigineqarnissaanik

kinguneqassasoq naatsorsuutigineqartariaqarpoq. Ineqarnermut akiliutit qaffaatissaat missiliorneqarsinnaangillat.

Qaammatip naanerani ullormi aningaaseriviup ammaffiani kingullermi ineqarnermut, imermut kiassarermullu siumoortumik akiliutit akilerneqartut ineqarnermut, imermut kiassarermullu akiliisitsisarfik aqutigalugu akiligaasarmata, akissaqalernissamut aningaasanik pissarsivigineqarsinnaanissaat ilimanaateqartorujussuuvoq. Ineqarnermut, imermut kiassarermullu akiligassat piffissami attartortup kontomini aningaasanik pigisaqarfissaatut naatsorsuutigisaqarfiusumi akiligassanngortinneqartarput, ilaatigut akissarsiat ilaatigullu pisortanit ikiorsiissutit qaammatip naanerani ullormi aningaasaateqarfiup ammaffiani kingullermi tiguneqarsinnaasussanngorlugit akilerneqartarmata. Siunnersuut ineqarnermut akiliutinik akilinngitsuukkanik anisitaasaarnernillu ikilisitsinermik kinguneqarsinnaavoq.

### **7. Pingaarutillit allat kingunerisinnaasai**

Siunnersuut ineqarneq pillugu ataatsimoortumik aaqqissuusseqqinnermut, siunissamilu kommunit aningaasaataannik aqutsinissamut, ineqarnermullu tunngasunut suliniarnerinut ilanngunneqassaaq. Allaffissornikkut systeminut, taakkulu naleqqussarneqarnissaannut sunniuteqassaaq, inissianillu aqutsinermut akigititanut sunniuteqarsinnaalluni.

Siunnersuutit allatigut aningaasatigut annertuumik kinguneqassasoq naatsorsuutigineqanngilaq.

### **8. Oqartussanut kattuffinnullu tusarniaaneq**

Siunnersuut tusarniaaffiusussanut arlalinnut 23. oktober 2020 – 20. november 2020-mi tusarniaassutigineqarpoq, aammalu piffissami tassani [www.naalakkersuisut.gl](http://www.naalakkersuisut.gl) aqutigalugu tusarniaanernut iserfissiakkut tamanut ammasumik tusarniaassutigineqarluni. Tusarniaaneq pillugu ilanngussaq 2 innersuussutigineqarpoq.

**Siunnersuummi aalajangersakkanut ataasiakkaanut nassuiaatit***§ 1-imut**Nr. 1-imut*

## § 20 a-mut

Inissianik attartortitsisarneq pillugu Inatsisartut peqqussutaanni § 20-mut, siunnersuut immikkut periarfissiivoq. § 20 naapertorlugu inuit pineqartut siunnersuummi aamma pineqarput. Kommunit atorfillit suliffimmut atatillugu inissiamik innersuunneqarsinnaatitaasut § 20-mi ilaatinneqanngillaq.

Siunnersuutip kingunerisaanik naalagaaffimmi atorfillit, Inatsisartut imaluunniit Naalakkersuisut inissiamik innersuunneqarsinnaatitaallutik suliffimmut atatillugu, Namminersorlutik Oqartussat imaluunniit kommunit attartortittagaataat ukiut tallimat kingulliit iluini oqoqarsimasut nalunaarsorfianni allassimasumik inissianik innersuunneqartumik itigartitsisinnaatitaallissapput.

Suliffimmut atatillugu inissiaq innersuunneqartoq atorfillip tigungmanngippagu, atorfillip suliffimmut atatillugu inissiamik innersuunneqarsinnaatitaanini annaassanngilaa, soorluttaaq utaqqiisaagallartumik ineqartitaanerminut ajunngitsorsiani annaassanngikkai, sulisitsisullu akiligaanik utaqqiisaagallartumik suli inissinneqarsinnaatitaassalluni.

Namminersorlutik Oqartussat imaluunniit kommunit attartortittagaataat ukiut tallimat kingulliit iluini oqoqarsimasut nalunaarsorfianni allassimasumik inissianik innersuunneqartumik taamaallaat atorfilik itigartitsisinnaatitaassaaq.

Suliffimmut atatillugu inissiaq innersuunneqartoq namminersorluni attartortitsisartumit assersuutigalugu Illuut A/S-imit pigineqarpat, inissiaq nalunaarsuisussaataitanermit ilaatinneqanngilaq, siunnersuutitigullu § 20 a atorineqarsinnaassanani.

*Nr. 2-mut*

## § 32 a-mut

INI A/S-ip isumagisaani inissiami attartortittakkami oqoqartoq paasineqarpat inissiaq oquijarneqassaaq, kingornalu inissiaq ilumut oqoqarunnaarsimasooq pillugu avataanit siunnersortimit uppersarneqassalluni. Taassuma kingorna inissiaq nalinginnaasutut neqeroorutigineqassaaq.

Inissiani attartortittakkani, Iserit A/S-imit aqunneqartuni attartortut ninnerinut atatillugu oqoqassutsimik misissuisoqartarpoq. Inissiaq attartortittagaq, Iserit A/S-imit aqunneqartoq oqoqartoq paasineqarpat inissiaq iluarsaanneqassaaq, tamatumalu kingorna siunnersortip avataaneersup inissiap attartortittakkap oqoqannginnera uppernarsassavaa. Tamatuma kingorna inissiaq attartortittagaq nalinginnaasumik neqeroorutigineqarsinnaalissaaq.

§ 32 a naapertorlugu nalunaarsorneqarsimasumik inissiamik innersuussinnermi, nalunaarsuisimaneq pillugu paasissutissiisoqartassasoq siunnersuuteqarnermi piumasarineqarpoq. Inissiaq qaqugukkut oqoqarsimansoq, qanoq annertutigisumik oqoqarsimansoq kiisalu qanoq iliorluni aammalu qaqugukkut suliarineqarsimansoq paasissutissiissutigineqassaaq.

Paasissutissiisoqarsimanngitsaq paasineqarpat, Inissianik attartortitsisarneq pillugu Inatsisartut peqqussutaani § 7-imi imm. 3 naapertorlugu Naalackersuisut tamanna pillugu nalunaarummi malittarisassanik aalajangersaasinnaapput.

Imm. 1-imut

Siunnersuut naapertorlugu inissiat attartortittakkat Namminersorlutik Oqartussat kommunilluunniit pigisaat nalunaarsorneqassapput. Namminersortunit attartortittakkanut, namminersortunullu inatsisit atuuttut tunngavigalugit selskabinit attartortinneqartartunut aalajangersagaq atuutinngilaq. Tamanna selskabinut Namminersorlutik Oqartussanit kommuniniilluunniit tamakkiisumik ilaannakortumilluunniit pigineqartunut aamma atuuppoq.

Inissiat attartortittakkat ukiut kingulliit tallimat iluini oqoqarsimasut nalunaarsorneqartassapput. Siunnersuutip atuutilerfianit ukiunut tallimanut kingumut attartortitsisoq nalunaarsuissaaq. Taasuma kingorna inissiat attartortittakkat oqoqalersimasut ataavartumik nalunaarsorneqartassapput. Assinganik inissiat attartortittakkat oqoqalersimanerinit ukiut tallimat sinnerlugit qaangiunnerini nalunaarsuiffimmit peerneqartassapput.

Imm. 2-mut

Inissiaq attartortittagaq oqoqarsimalluni nutarterneqarsimasoq, misissuinikkullu oqoqarunnaarsimasoq paasineqarpat, inissiaq nalunaarsorneqassanngilaq. Inissiat attartortittakkat nutarterneqarsimasut pillugit paasissutissat, inissiap ullormi innersuunneqarfiani inissiap qanoq inneranik naliliinissami pisariaqanngitsutut isigineqarpoq.

Assersuutigalugu Namminersorlutik Oqartussat inissiaataannut attartortittakkanut kiisalu tamakkiisumik nutarterinissamut najoqqutassiat malillugit inissiat iluatungaataq nutarterneqarlutik “inissianut qungujulasunut” najoqqutassaq naapertorlugu

nutarterneqarsimasunut aalajangersagaq atuuppoq. Oquk patsisaalluni nutarterinissanut Namminersorlutik Oqartussat aningaasanut inatsisaatigut ataavartumik aningaasanik immikkoortitsisoqartarpoq. 2021-mut tunngatillugu AI- 2021-mi konto pingaarneq 89.72.12 Inissialiassat taartissanillu inissialiortiterneq innersuussutigineqarpoq.

Inissiaq oqoqanngitsoq pillugu uppernarsaammik takutitsisoqarsinnaappat, imm. 1 naapertorlugu nalunaarsuinissaq pinngitsoorneqarsinnaavoq. Misissuineq suliamik ilisimasalinnit, Namminersorlutik Oqartussat kommunilluunniit inissiaataannut attuumassuteqanngitsumit suliarineqassaaq. Misissuineq suliamik ilisimasalimmit attuumassuteqanngitsumit suliarineqarsinnaanngippat, oquk suliarineqareersoq pillugu paasissutissat nalunaarsorneqassapput.

Imm. 3-mut

Namminersorlutik Oqartussat imaluunniit kommunit attartortittagaataat ukiut tallimat kingulliit iluini oqoqarsimasut nalunaarsuiffissaannik ilusilersuinissamut malittarisassanik aalajangersaanissaannut Naalakkersuisut piginnaatinneqarput.

Nalunaarsuiffimmik pilersitsinermut ingerlatsinermullu aningaasartuutissat aningaasartuutissat naatsorsuutigineqartunit amerlanerusut paasinarsissappat, Naalakkersuisut malittarisassanik aalajangersaasinnaapput, taannalu malillugu suliffimmut atatillugu inissiat attartortitassat assersuutigalugu naalagaaffimmi atorfilinnut, Inatsisartunut, Naalakkersuisunullu innersuunneqartut kisimik nalunaarsuisussaataitanermut ilaatinneqassapput.

Soorlu assersuutigalugu uffarfimmi igaffimmilu kannerit isugutsertarnerminni oqoqalersimasut taarsersorneqarneri, annertunngitsumik oqoqalersimasutut isigineqarput. Assinganik silaannarissaasanninnerup imaluunniit illup iluani atisanik manisisarnikkut isugutattarnerata kingunerisaanik, igalasserfinni annertunngitsumik oqoqalersimasut aamma pineqarsinnaapput.

§ 32 b-mut

Sulisunut inissiaq attartortittagaq, Namminersorlutik Oqartussanit kommuninilluunniit pigineqartoq, ukiuni tallimani oqoqarsimalluni inissianut attartortittakkanut, Namminersorlutik Oqartussanit kommunimilluunniit pigineqartunut ukiut tallimat kingulliit iluanni nalunaarsorsimappat inissiaq immikkut ittumik inuttaqanngissinnaavoq.

Inissiaq attartortittagaq, Namminersorlutik Oqartussanit kommunimilluunniit pigineqartoq sionatigut oqoqarsimanera peqqutigalugu attartortitsinapiloornerup kingunerisaanik Namminersorlutik Oqartussanit imaluunniit kommunimit ilaannaasumik ingerlatsinermut

tapiissuteqartoqarneratigut taarsiisoqarsinnaavoq. Tamatuma kingunerisaanik attartortitsinermi isertitassatut annaasat missiliorneqarsinnaanngillat.

Namminersorlutik Oqartussat inissiaataat attartortittagaq allamut attartortinneqarsinnaanngippat, siunnersuut naapertorlugu Namminersorlutik Oqartussat imaluunniit kommuni assigiissaarneqarsimasumik ingerlatsinermut tapiissuteqassapput. Ingerlatsinermut tapiissuteqarnissamut inissiap attartortittakkap allamut attartortinneqarsinnaannginnissaa, tamatumalu kingunerisaanik najugaqarfiup ingerlatsinermut missingersuutini amigartoorutaasunik matussusiisinnaannginnissaa piumasarineqarpoq. Najugaqarfiup ingerlatsinermut missingersuutit amigartooruteqarfiginagit inissiamut inoqanngitsumut aningaasartuutit akilersinnaappagit, § 32b naapertorlugu ingerlatsinermut tapiissuteqartoqarsinnaanngilaq. Atuineq ilanngunnagu qaammammut ineqarnermut akiliutit ingerlatsinermi tapiissutit naleqqatigissavai, inissiamullu ataatsimut ukiumut ataasiarluni, annerpaamillu pingasoriarluni ingerlatsinermut tapiissuteqartoqarsinnaassalluni.

Namminersorlutik Oqartussat imaluunniit kommunit attartortittagaataat ukiut tallimat kingulliit iluini oqoqarsimasut nalunaarsorfianni allassimasumik suliffimmut atatillugu inissiatut innersuussinerni atorfillit, atorfeqarsimanerisalu sivilissusaat naapertorlugu atorffimmut atatillugu inissiamik innersuunneqarnissaat attartortitsisup isumagissagaa naatsorsuutigineqarpoq. Inissiat immikkut ittumik attartortinneqanngitsut attartortinneqarnissaannut tamanna aqutissiuusseqataasinnaavoq.

*Nr. 3-mut*

§ 38-mut

Imm. 1-mut

Siunnersuut massakkut atuulluni § 38, imm. 1 assigaa.

Attartornermut isumaqatigiissutitigut ulloq akililiiffissatut aalajangersarneqarsimasumi attartortup ineqarnermut, allatigullu aningaasartuutissaminut akiliinissaanut pisussaaffia, aalajangersakkap aalajangersarpaa. Tamanna attartortitsumut pisariaqartumik eqaatsuutitsissaaq.

Imm. 2-mut

Attartornermut isumaqatigiissummi allatut aalajangersarneqarsimatinnagu ineqarnermut, imermut, kiassarnermullu qaammammut pineqartumut akiligassaq, qaammatip naanerani aningaaseriviit ulloq kingulleq ammasarfiini qaammammut siumoortumik

akilerneqartalissapput. Ullormi kingullermi akiliiffissami akiligassaq akilerneqartassaaq. Ullormi kingullermi akiliiffissap kingorna akiliinissamut ullunik periarfissiisoqartassanngilaq.

Erseqqissaatigineqassaaq ineqarnermut, imermut, kiassarnermullu akiligassat akilerneqarnissaannut attartortitsisup piffiussalissatut aalajangersagaatut akileeqqusissuteqarsinnaammat, assersuutigalugu ullut 14-ikkaarlugit. Ullormi kingullermi akiliiffissami akiligassaq akilerneqartassaaq. Ullormi kingullermi akiliiffissap kingorna akiliinissamut ullunik periarfissiisoqartassanngilaq.

Assersuutigalugu ullut 14-ikkaarlugit ineqarnermut il.il. akiliuteqartarnissaminik attartortoq piunasaqarsinnaanngilaq. Ineqarnermut akiliuteqaqqusisarnermi allaffissornikkut aningaasaqarnikkullu kingunerisinnaasai, akiliuteqartitsisarnermilu periuseq sorleq akiitsoqalernissamut sapinngisamik pinngitsoortitsisinnaanersoq attartortitsisup nalilersussavaa.

#### Imm. 3-mut

Attartornermut isumaqatigiissutitigut ulloq akililiiffissatut aalajangersarneqarsimasumi ineqarnermut, allatigullu aningaasartuutissaminut attartortitsisup akiliiffissatut innersuussaanut, qanorlu akiliuteqartarnissamut attartortitsisup innersuussutigisaatut attartortup akiliinissaminut pisussaaffii, aalajangersakkap aalajangersarpaa. Attartortitsisoq akiliiffissamik innersuussisimangippat ineqarnermut akiliut il.il. attartortitsisup niuerneramik ingerlataqarfiani akilerneqassaaq.

#### Nr. 4-mut

Aalajangersagaq aqputigalugu Inatsisartut peqqussutaani taaguutit Namminersorneq pillugu inatsimmut naapertuuttunngorlugit iluarsineqarput.

#### § 2-mut

#### Imm. 1-imut

Siunnersuutip atuutsilersinneqarnissaanut piffissaliussaq aalajangersakkami aalajangersarneqarpoq.

#### Imm. 2-mut

Siunnersuutip § 1-mi nr. 1-2-p atuutsilerneqarnissaannut piffissaliussaq Naalakkersusiut aalajangersassavaat.

Qarasaasiatigut programmit pisariaqartinneqartut pissarsiarineqarnissaat, allaffissornikkullu systemit allat naleqqussarneqarsimanissaat kiisalu Namminersorlutik Oqartussat imaluunniit kommunit attartortittagaataat ukiut tallimat kingulliit iluini oqoqarsimasut nalunaarsorneqarnissaat qulakkeerneqassaaq. Tamatuma saniatigut inissiaq qaqugukkut oqoqarsimansoq, qanoq annertutigisumik oqoqarsimansoq, oquijaasimanerlu aamma nalunaarsorneqassapput.

Tamatuma saniatigut inissianik attartortittakkanik neqerooruteqartarnermi, suliffillu aqqutigalugu inissianik innersuussisarnermi allaffissornikkut nalinginnaasumik suleriaatsini periutsinilu nalunaarsuinerup ilaatinneqarsinnaanissaa qulakkeerneqassaaq.

## Ilanngussaq 1 – Peqatigitillugu ilanngussaq

<b>Siunnersuut peqqussummut atuuttumut naleqqiullugu</b>	
<i>Oqaaseqatigiit atuuttut</i>	<i>Siunnersuut</i>
	<p style="text-align: center;"><b>§ 1</b></p> <p>Inissianik attartortitsisarneq pillugu Inatsisartut peqqussutaanni nr. 2, 12. maj 2005-imeersumi, kingullermik Ilinniartut ineqarfii pillugit inatsisartut inatsisaanni nr. 42-mi, 12. december 2019-imeersumi § 50 aqqutigalugu allanngortinneqartumi tulliuuttut allanngortinneqassapput:</p>
	<p><b>1.</b> § 20-p kingorna ilanngunneqassaaq: ” § 20 a. § 20-mi, imm. 1-imi allassimasut apeqqutaatinnagit, inissiat ukiut kingulliit tallimat iluini oqoqarsimasutut attartortitsisup nalunaarsuiffianni inissiaq allassimappat, atorfilik sulisunut inissiamik innersuunneqartumik itigartitsisinnaavoq, takuuk § 32 a. taamaaliornermigut sulisunut inissiamut innersuunneqarsinnaatitaaneq, inissikkallarneqarnissamut ajunngitsorsiaqarsinnaatitaaneq imaluunniit sulisitsisup akiligaanik inissiigallarnermik ingerlatitseqqissinnaaneq annaanngikkaluarlugu.”</p>
	<p><b>2.</b> § 32-p kingorna ilanngunneqassaaq: ” § 32 a. Namminersorlutik Oqartussat imaluunniit kommunit inissiaataat attartortittakkat, ukiut tallimat kingulliit iluini oqoqarsimasut nalunaarsorneqassapput. Inissiaq qaqugukkut oqoqarsimanersoq, qanoq annertutigisumik oqoqarsimanersoq, oquijaanerlu pillugit attartortitsisoq nalunaarsuissaaq. <i>Imm. 2.</i> Oquk patsisaalluni inissiaq attartortittagaq nutarterneqarsimappat, inissiarlu attuumassuteqanngitsumit paasisimasalimmiillu misissuinikkut</p>

	<p>oqoqarunnaarsimasut  uppersarneqarsimappat, imm. 1  naapertorlugu nalunaarsuinissaq  pinngitsoortinneqarsinnaavoq. Inissiaq  oqoqarunnaarsimasoq misissuinerup  uppersarsassavaa.</p> <p><i>Imm. 3.</i> Nalunaarsuinissaq pillugu,  matumani inissiat attartortittakkat sulisunut  inissiatut atorpeqartut kisimik  nalunaarsorneqarnissaat kiisalu inissiat  attortittakkat annertugisassaangitsumik  oqoqartut nalunaarsorneqartariaqannginnerat  ilanngullugit, Naalakkersuisut  malittarisassanik aalajangersaasinnaapput.</p> <p><b>§ 32 b.</b> §§ 11, 12, 15, 16, 17-ilu  innersuussutigalugit atorfillip sulisunut  inissiaq § 32 a naapertorlugu  nalunaarsorneqarsimalluni Namminersorlutik  Oqartussanit pigineqarluni innersuunneqartoq  tigujumangippagu, Namminersorlutik  Oqartussat najugaqarfimmut ingerlatsinermut  tapiissuteqassaaq. Inissiaq attartortittagaq  allamut attartortinneqarsinnaangippat aamma  najugaqarfiup tamatuma kingunerisaanik  ingerlatsinermut missingersuutimini  amigartoorutini matusinnaangippagu,  ingerlatsinermi tapiissutit tunniunneqassapput.  Atuineq ilanngunnagu qaammammut  attartornermi akiligassaq, ingerlatsinermi  tapiissutit naleqqatigissavai. Ukiumut  ataasiarluni ingerlatsinermut  tapiissuteqartoqarsinnaavoq, inissiamullu  ataatsimut annerpaamik pingasoriarluni  ingerlatsinermut  tapiissuteqartoqarsinnaalluni.”</p>
<p><b>§ 38.</b> Attartortoq pisussaavoq ineqarnermut,  imermut kiassarermullu akiligassanik,  attartornermut isumaqatigiisummi</p>	<p><b>3.</b> § 38 tulliuttutut oqaasertalerneqassaaq:  ” <b>§ 38.</b> Attartortoq pisussaavoq  ineqarnermut, imermut kiassarermullu  akiligassanik, attartornermut</p>

<p>aalajangersarneqartumi akiliinissamut piffissaq eqqorlugu akiliisassalluni.</p> <p><i>Imm. 2.</i> Attartortitsisoq akiliiffissamik akileeriaasissamillu innersuussissaaq. Akiligassat, tak. imm. 1, kingusinnerpaamik akiliiffissap kingulliup qaangiunnerata kingorna ulluinnaat pingajuanni akilerneqarsimassapput. Ulloq taanna arfiningorneruppat, nalliuttuuppat imaluunniit Inuiaat Ullorippassuk ulluinarmi tullermi akiliinissaq piffissaq eqqorlugu akiliinerussaaq. Aningaaserivikkut akiliineq akiliiffissatut innersuunneqartumut akiliinertut isigineqassaaq. Akiliiffissamik innersuussisoqarsimanngippat ineqarnermut akiliut attartortitsisup niuernermik ingerlataqarfianut imaluunniit attartortitsisoq avataaniit aqutsisumik atuippat, taassuma niuernikkut ingerlataqarfianut akilerneqassaaq.</p>	<p>isumaqatigiisummi aalajangersarneqartumi akiliinissamut piffissaq eqqorlugu akiliisassalluni.</p> <p><i>Imm. 2.</i> Attartornissamut isumaqatigiisummi allatut aalajangersagaqanngippat ineqarnermut, imermut kiassarnermullu qaammammi pineqartumi akiligassat qaammatip naanerani aningaaseriviit ulloq kingulleq ammasarfiini qaammammut siumoortumik akilerneqartassapput. Ineqarnermut, imermut, kiassarnermullu akiligassat qaammammut naatsorsorneqaratik piffissamut allamut akilerneqartussatut naatsorsorneqartut, aningaaseriviit ulloq kingulleq ammasarfiini piffissamut pineqartumut siumoortumik akilerneqartassapput. Piffissaagallartillugu akiliineq, ullormi akiliiffissatut kingullermi kingusinnerpaamik akiliisoqartassaaq.</p> <p><i>Imm. 3.</i> Attartortitsisoq akiliiffissamik akileeriaasissamillu innersuussissaaq. Aningaaserivikkut akiliineq akiliiffissatut innersuunneqartumut akiliinertut isigineqassaaq. Akiliiffissamik innersuussisoqarsimanngippat ineqarnermut akiliut attartortitsisup niuernermik ingerlataqarfianut imaluunniit attartortitsisoq avataaniit aqutsisumik atuippat, taassuma niuernikkut ingerlataqarfianut akilerneqassaaq.”</p>
	<p><b>4.</b> Inatsimmi tamarmiusumi “Naalakkersuisut” “Naalakkersuisut”-nut, “Naalakkersuisut” “Naalakkersuisut”-nut, ”Naalakkersuisuni ilaasortanut pisortanullu inissiat” ”Naalakkersuisuni ilaasortanut aamma Naalakkersuisoqarfinni pisortanut inissiat”-nut aamma ”Naalakkersuisuni ilaasortat aamma Naalakkersuisoqarfinni ataasiakkaani pisortat” ”Naalakkersuisuni ilaasortat aamma Naalakkersuisoqarfinni pisortat”-nut</p>

	<p>allanngortinneqassapput. Aamma inatsimmi tamarmiusumi “Namminersornerullutik Oqartussat” “Namminersorlutik Oqartussat”-nut, “Namminersornerullutik Oqartussat” “Namminersorlutik Oqartussat”-nut, “Namminersornerullutik Oqartussanit pigineqartut” “Namminersorlutik Oqartussanit pigineqartut”-nut, “Inatsisartut” “Inatsisartut”-nut, “Inatsisartut aningaasaqarnermut inatsisaat” “aningaasaqarnermut inatsit”-mut aamma “Inatsisartut aningaasaqarnermut inatsisai” “aningaasaqarnermut inatsisit”-nut allanngortinneqassapput.</p>
	<p style="text-align: center;"><b>§ 2</b></p> <p>Inatsisartut inatsisaat 2022-mi januaarip aallaqqaataani atuutilissaaq.</p> <p><i>Imm.</i> 2. § 1, nr. 1-ip aamma nr. 2-p atuutilerfissai, nalunaarutikkut Naalakkersuisut aalajangersassavaat.</p>

Ilanngussaq 2 – Tusarniaanermi allakkiaq

Siunnersuut tusarniaaffissanut ukununnga tusarniutigineqarpoq:

**Naalakkersuisut Siulittaasuata Naalakkersuisoqarfia**

**Iisimatusarnermut Avatangiisinullu Naalakkersuisoqarfik**

Aningaasaqarnermut Naalakkersuisoqarfik

Aatsitassanut Naalakkersuisoqarfik

Aalisarnermut, Piniarnermut Nunalerinermullu Naalakkersuisoqarfik

Inuussutissarsiornermut Naalakkersuisoqarfik

Suliffeqarnermut Naalakkersuisoqarfik

**Isumaginninnermut, Ilaqutariinnut Inatsisinullu Naalakkersuisoqarfik**

Peqqissutsimut Naalakkersuisoqarfik

**Ilinniartitaanermut, Kultureqarnermut, Ilageeqarnermullu Naalakkersuisoqarfik**

**Nunanut Allanut Nukissiuuteqarnermullu Naalakkersuisoqarfik**

Avannaata Kommunia

Qeqqata Kommunia

Kommuneqarfik Sermersooq

Kommune Kujalleq

Kommune Qeqertalik

KANUNUPE

INI A/S

**Iserit A/S**

SIK (Sulinermik Inuussutissarsiuuteqartut Kattuffiat)

Sulisitsisut (GE)

Peqqinnissaq Pillugu Kattuffiit (PPK)

Nunatsinni Perorsaasut Kattuffiat (NPK)

**Atorfillit Kattuffiat (AK)**

**IMAK (Ilinniartitsisut Meeqqat Atuarfianeersut Kattuffiat)**

**Ilinniagartuut Kattuffiannut (ASG)**

Mittarfeqarfiit

Nukissiorfiit

Asiaq

Kalaallit Nunaanni Rigsombudsmandi

**Kalaallit Nunaanni Politimestereqarfik**

Siuliani tulleriarlugit silittumillu allannilerlugit tusarniaaffigineqartunit, tusarniaanerup qaangiunnerani akissuteqaatit tiguneqarput. Tusarniaaffigineqartut siunnersuummut

oqaaseqaataat tulliuuttumi atuarneqarsinnaapput. Tusarniaanermi akissutinut Naalakkersuisut oqaaseqaataat, uingasumik allassimapput:

Nunanut Allanut, Nukissiuutinullu Naalakkersuisoqarfik, Kalaallit Nunaanni Politiit, Iisimatusarnermut Avatangiisinullu Naalakkersuisoqarfik, Isumaginninnermut, Ilaqutariinnut, Inatsisillu Atuutsinneqarnerannut Naalakkersuisoqarfik, Ilinniartitaanermut, Kultureqarnermut, Ilageeqarnermullu Naalakkersuisoqarfik kiisalu IMAK-ip ilisimatitsissutigaa, siunnersuummut oqaaseqaatissaqaratik.

Qaammatip naanerani aningaaseriviit ulloq kingulleq ammasarfiini ineqarnermut akiliutit siumut akilerneqartarnissaat pillugu siunnersuummut, Iserit tunngaviusumik isumaqataavoq. Taamaakkaluortoq attartornermi akiliutinik qaammatip tulliata aallartinnerani, imaappoq attartornermi qaammammi akiliiffissami, Nets Betalingsservicep ilanngaassisarnera tamatumani ilanngullugu isiginiarneqassaaq.

*Tusaatissatut tiguneqarpoq. Paasisutissiissutigineqarsinnaavoq, ullormik akiliisarfiissamik neqerooruteqartumut, matumani Nets Betalingsservicemut, nammineq isumaqatigiissusiornissamut tunngaviusumik periarfissaqarmat.*

Iserit oqaatigaa, attartortittakkami siornatigut oqoqarsimappat, imermit ajoqusersimasoqarsimappat, assingusumilluunniit ajoqusersimasoqarsimappat, inissiap attartorteqqinnginnerani taakku iluarsineqareersimassammata taakku pingaaruteqanngitsut. Tamatuma saniatigut attartortitsisarneq pillugu peqqussutip § 45-a Iserit innersuussutigaa, tassani allassimammat attartortittakkani illuutit attartortitallu isumannaatsumik aserfallatsaaliorneqarnissaasa isumagineqarnissaa attartortitsisup pisussaaffigigaa. *Attartortittakkani illuutit attartortitallu isumannaatsumik aserfallatsaaliorneqarnissaasa isumagineqarnissaanik attartortitsisoq § 45 naapertorlugu pisussaaffeqareermat ilumoorpoq. Inissiaq isumannaatsumik aserfallatsaaliorneqarsimangippat attartortinneqarsinnaanngilaq. Taamaattumik inissiaq attartortittagaq siornatigut oqoqarsimansoq pillugu nalunaarsuineq, oqoqarsimaneranik paasisutissaannaavoq.*

Attartortut suliffimmut atatillugu inissaminnik tunineqarnerminni inissiami ukiut tallimat kingulliit iluini oqummik ajornartorsiuteqartoq paasineqarsimagaangat, attartortut inissiamik allamik tunineqarnissaminnik annaasaqaratik naaggaarsinnaalernissaat eqqarsaatigalugu Iserit isumaqarpoq, attartugassap isumannaatsuunissaa aserfallatsaaliorneqarsimanissaalu attartortitsisup suli qulakkeertussaammagu, inissiamut tunngatillugu pisimasutut paasisutissat pingaaruteqanngitsut, takuuk attartortitsisarneq pillugu peqqussutip § 47. Iserit ilanngullugu erseqqissaatigaa, sumiiffimmi allami initaarusulluni, isikkiviginnerusumiikkusulluni il.il., inissamut naaggaarnissamut periarfissaq taanna utoqqatsissutitut atorneqaleratarsinnaasoq.

*Tassunga tunngatillugu oqaatigineqassaaq, inissiaq neqeroorutigineqartoq siornatigut oqoqarsimappat, suliffimmut atatillugu inissamik tunineqarnermi aatsaat naaggaartoqarsinnaammat. Suliffimmut atatillugu inissamik tunineqarnermi naaggaarnissamut patsisaasut allat akuerineqarsinnaanngillat, inissialli siusinnerusukkut oqoqarsimanerata kingunerisaanik pissutsit allat suliffimmut atatillugu inissiamik neqeroorutigineqartumik naaggaarnissamut sunniuteqarsinnaasut matunneqarsinnaanngilaq.*

Inissiamik siornatigut oqoqarsimasumik naaggaarsinnaanermut periarfissaq, ASG-p ilinniarnertuullu peqatigiiffiisa tapersorsorpaat. Tamatuma saniatigut ASG-p ilinniarnertuullu peqatigiiffiisa siunnersuutigaat, siunnersuutip imm. 1-ianut tulliuuttoq ilanngunneqassasoq: ”... Inissamik tunineqarnermi attartortoq tamanna pillugu, paasisutissallu nalunaarsorneqarsimasut pillugit, nalunaarsuiffimmilu paasisutissanik takunnissinnaanerani allakkatigut ilisimatinneqassaaq.” Tamatumani neqeroorfigitittup inissiamik neqeroorfigineqartumik akuersissanerluni isummernissaa sioqqullugu, inissiap oqoqarsimanagera pillugu paasisutissanik pissarsisimanissaa ASG-p ilinniarnertuullu peqatigiiffiisa tunngavilersuutigaat.

*Attartortittakkani illuutit attartortitallu isumannaatsumik aserfallatsaaliorneqarnissaasa isumagineqarnissaanik attartortitsisoq § 45 naapertorlugu pisussaaffeqareerpoq. Inissiaq isumannaatsumik aserfallatsaaliorneqarsimanngippat attartortinneqarsinnaanngilaq. Taamaattumik inissiaq attartortittagaq siornatigut oqoqarsimangersoq pillugu nalunaarsuineq, oqoqarsimanageranik paasisutissaannaavoq. Oqoqarsimangersoq, oqoqarsimannginnersorluunniit attartortup ilisimanninnissaa, attartortumut pingaarnerpaavoq. Qanoq-ittumik oqoqarsimanagera pillugu attartortup ilisimatinneqarnissaa pingaarnerpaanngilaq, inissiarli pillugu pisimasut pillugit paasisutissat pingaaruteqarlutik.*

Tamatuma saniatigut ASG ilinniarnertuullu peqatigiiffiat isumaqarput, oquiarneqarsimagaluarpulluunniit inissiap oqoqarsimanageranik suli nalunaarsuisoqartassasoq, ilutigalugulu inissiap oqoqarunnaarsimanagera pillugu paasisimasallip nalunaarusiaa paasisutissani ilaatinneqartassasoq.

*Ukiuni kingullerni tallimani inissiami pisimasut nalunaarsorneqartassapput. Namminersorlutik Oqartussat kommunilluunniit inissiaataanni attartortittakkani ukiut kingulliit tallimat iluini oqoqarsimasut nalunaarsorneqartassapput. Inissiaq qaqugukkut oqoqarsimangersoq, qanoq annertutigisumik oqoqarsimangersoq, oquiaasimanagerlu pillugit attartortitsisoq nalunaarsuisassaaq.*

Kiisalu ASG ilinniarnertuullu peqatigiiffiat isumaqarput, siunnersuummi § 32 a innersuussutigalugu, oquup kingusinnerusukkut siaruaatinnginnissaa qulakkeerumallugu, oqoqalersimasut tamarmik nalunaarsorneqartassasut.

*Inissiaq attartortittagaq siornatigut oqoqarsimangersoq pillugu nalunaarsuisoqartaruni naleqqunnerpaassasoq nalilerneqarpoq. Inissiaq nutarterneqarsimappat, ajornartorsiutaasoq*

*aaqqinneqarsimassaaq. Tassunga allaanerusutut paasissutissiissutigineqarsinnaavoq, inissiaq eqqiarnegarsimassappat allatigulluunniit iluarsiiisuteqartoqarsimassappat, siusinnerusukkut oqoqarsimanera pillugu paasissutissat suli nalunaarsuiffimmiissapput. Inissiaq attartortittagaq nutarterneqareerpat, taamaalillunilu ajornartorsiutaasoq aaqqinneqareerpat, ajornartorsiutaasoq aaqqinneqareersimagaluarpuunniit inissiaq siornatigut oqoqarsimasutut naqissuserneqaratarsinnaavoq.*

Atorfillit Kattuffiat isumaqarpoq, Namminersorlutik Oqartussat kommunillu inissiani attartortittagaataanni oqoqalersartunik nalunaarsuisussaataaneq isumalluarnartoq, naatsorsuutigalugulu pisussaaffik taanna aamma sulisunut inissianik INI A/S-ip, Illuut A/S-ip Iserit A/S-illu aqutaanni aamma atuutissasoq.

*Namminersorlutik Oqartussat kommunilluunniit inissiaataanni attartortittakkani ukiut kingulliit tallimat iluini oqoqarsimasut nalunaarsorneqartassapput. Illuut A/S-ip illuutitik namminneq pigaat, taamaattumillu siunnersuummi matumani taakku ilaatinneqaratik.*

Atorfillit Kattuffiata siunnersuutigaa, inatsisit namminersortunut atuuttut tunngavigalugit aaqqissuussaasutut inissiani attartortittakkani namminersortunit selskabinilluunniit pigineqartuni, inissiat piffissami aalajangersimasumi pisortani atorfilinnut suliffimmut atatillugu inissiatut atorneqarsimappata, inissiani attartortittakkani oqoqalersartunik nalunaarsuisussaataaneq taakkununga aamma atuutissasoq.

*Inatsisit namminersortunut atuuttut tunngavigalugit aaqqissuussaasutut inissiat attartortittakkat namminersortunit selskabinilluunniit pigineqartut siunnersuummut ilaatinneqanngillat. Taamaakkaluartoq inatsisit namminersortunut atuuttut tunngavigalugit aaqqissuugaallutik namminersortut selskabilluunniit, assinganik aaqqiissummik namminneq kajumissutsiminnik atuinissaannut aporfissaqanngilaq.*

Namminersorlutik Oqartussat kommunilluunniit inissiaataanni attartortittakkani ukiut kingulliit tallimat iluini oqoqarsimasutut nalunaarsorsimasumik sulisoq suliffimminut atatillugu inissiamik tunineqartilluni tigusiumanngitsoq, suliffimmut atatillugu inissiamik allamik tunineqarnissaminnik annaasaqassanersoq, sulisullu utaqqiisigalugu ineqartitaanermi ajunngitsorsiani annaassanera imaluunniit sulisitsisup akiligaanik suli ineqaannarsinnaassanersoq. Atorfillit Kattuffiat naapertorlugu siunnersuummi allassimangilaq. Atorfillit Kattuffiat naapertorlugu, oqaaseqaatini taamak pingaaruteqartigisoq siunnersuummi ilaatinneqartariaqaralarpoq.

*Siunnersuutip § 1-mi nr. 1 (§20a) ersarissarneqarpoq. Inissiap oqoqarsimanera pillugu paasissutissat patsisaallutik inissiamik innersuunneqartumik sulisoq naaggaarsinnaatillugu, sulisup suliffimminut atatillugu inissiamik tunineqarsinnaanissaminut pisinnaatitaaffini annaassanngilaa. Inissiamik naleqquttumik innersuussisoqarnissaata tungaanut, suliffimmut atatillugu inissiamik tunineqarnissamut utaqqisut allattorsimaffianni sulisoq suli allassimassaaq. Sulisup suliffimmut atatillugu inissiamik innersuunneqartumik tigusiumanngikkuni, suliffimmut atatillugu inissiamik innersuunneqarsinnaatitaanermi*

*sulisooq annaasaqassangilaq, utaqqiisigalugulu ineqartitaanermi suli  
ajunngitsorsiaqarsinnaatitaassaaq imaluunniit sulisitsisup akiligaanik suli  
ineqartitaasinnaassaalluni.*

Kommunimi atorfilinnut suliffimmut atatillugu ineqarsinnaatitaasunut siunnersuut  
atuutissanersooq Atorfillit Kattuffiat aperivoq.

*Namminersorlutik Oqartussani, Namminersorlutik Oqartussat suliffeqarfiutaanni,  
naalagaaffimmilu sulisunut, Inatsisartunut Naalakkersuisunullu siunnersuut kisimi  
atuutissaaq.*

Naalakkersuisut Siulittaasuata Naalakkersuisoqarfia isumaqarpoq, atuneq ilanngunagu  
ingerlatsinermit tapiissutit pineqartut, immikkoortoq 2.4.b-mut oqaaseqaatini  
ersarissarneqartariaqartoq.

*Najugaqarfimmut ingerlatsinermit tapiissuteqartoqarsinnaassaaq, inissiarlu attartortittagaq  
allamut attartortissinnaanngippat aatsaat ingerlatsinermit tapiissuteqartoqarsinnaassalluni.  
Ingerlatsinermit tapiissutit najugaqarfimmut tapiissutigineqassapput, inissiarlu  
attartortissimasussaannngimmat inissiamut atatillugu atuisoqartussaanani.*

Tamatuma saniatigut Naalakkersuisut Siulittaasuata Naalakkersuisoqarfia siunnersuutigaa,  
siunnersuutip § 32 a, imm. 2 innersuussutigalugu misissuinerit “attuumassuteqanngitsumit  
paasisimasalimmiillu” ingerlanneqassasut, tassungalu atatillugu nalunaarsuinerit  
pinngitsoorneqarsinnaasut ersarissarneqarsinnaasooq.

*Tusaatissatut tiguneqarpoq. § 32-mi imm. 2-mut oqaaseqaatini immikkoortoq nutaaq  
ilanngunneqarpoq.*

Kiisalu Naalakkersuisut Siulittaasuata Naalakkersuisoqarfia oqaatigaa, inissianut  
attartorneqanngitsunut aningaasartuutit tamakkernagit Namminersorlutik Oqartussanit  
taarserneqarsinnaasut. Tamatuma saniatigut inissianut attartorneqanngitsunut aningaasartuutit  
annertutillugit,

najugaqarfiit Nunatta Karsianit aningaasanik qinnuteqarsinnaapput. Siulittaasup  
Naalakkersuisoqarfia isumaqarpoq, siunnersuutip § 32 b innersuussutigalugu,  
Namminersorlutik Oqartussanut aningaasatigut kingunerisinnaasai maannamuugallartoq  
naammattumik ersarissarneqarsimannngitsut.

*Siunnersuummut attuumassuteqarlutik inissianut attartorneqanngitsunut aningaasartuutissat  
massakkut missiliorneqarsinnaanngillat. Taamaakkaluartoq  
paasisutissiissutigineqarsinnaavoq, aserfallatsaaliinissami kinguaattoorutinut  
attuumassuteqarlutik inissianut attartorneqanngitsunut aningaasartuutit maannangaaq  
ukkatarineqareermata, aningaasartuutillu taakkua sapinngisamik  
appasissumiisinniarneqarlutik. Inissianut attartorneqanngitsunut aningaasartuutit, konto  
pingaarnermi 72.10.16 Inissiat attartortittakkat ingerlanneqarnerat, aningaasaliissutinit*

*iluanaarutinit matussuserneqartassaput. Aningaasaliissutinit iluanaarutinit 2021-mi isertitassat 40 mio. koruuninut missiliorneqarput, inissianullu attartorneqanngitsunut aningaasartuutit 7 mio. koruuninut missiliorneqarlutik. Inissiamik nutarterinermut atatillugu inissiamut attartorneqanngitsumut aningaasartuutit, inissiallu oqoqalersimanageratigut inissiap attartorneqannginnerani aningaasartuutit ilaatigut ataatsikkut pissasut naatsorsuutigineqarpoq. Taamaattumik inissiap attartorneqannginnerani aningaasartuutit, konto pingaarnermit 72.10.16 Inissiat attartortittakkat ingerlanneqarnerat, aningaasaliissutinit iluanaarutinit matussuserneqarsinnaassasut naatsorsuutigineqarpoq.*